



Siverth K. Heilmann

UPA 2020/119-1

Atassut

27. april 2022

Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaata iluani avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingnisai qanoq isikkoqarnersut. Misissuineq inatsisartunut UPA 2023 nallertinnagu tunniunneqassaaq.

(Inatsisartunut ilaasortaq Jens-Frederik Nielsen, Demokraatit)

Pkt. 119

Siullermik inatsisartuni ilaasortaq Jens-Frederik Nielsen, Demokraatit inatsisartunut aalajangiiffigisassatut siunnersuuteqarninnut qujanaq, imatullu Atassummiit oqaaseqarfigissavarput.

Aalajangiiffigisassatut siunnersuut eqqartussallugu soqutiginartuaannartoq, inatsisartuni ilaasortatut pisinnaatitaaffiusoq paaserusullugu Kalaallit Nunaata iluani avammullu assartuineq sullissinerlu pillugu Naalakkersuisut misissuinissamik tunngavilersugaq. Siunnersuut assartuussinnermut aningaasartuutit qaffakkaluttuinnerinik imaqarmat inatsisartunullu UPA 2023 nallertinnagu tunniunneqareersimasussatut kissaatigineqarmat, tunngaviatigut Atassummiit taperserparput.

Taamak aallarneriarlunga oqaatigissavara, 1900-kut ingerlanerani eqqaamalluarakku Kalaallit Nunaanniit avammullu utimullu tamakkiisuunngikkaluamik namminersortut suleqatigilluarneqarnikummata. Kiisalu kingusinnerusukku Kalaallit Nunaata nammineq umiarsuaatai, selskabit pilersiorneqarnerisa kingornagut kiffartuussinissamik aqqissuuffigineqarnerit ataasianngeqaluta maani inimi politikkikkut aalajangiisarnerit aallutaratsigit.

Nunatta avataaniit pilersorneqarnera utimullu nammineq nioqqutissaatigut akit allangorartuarnikuupput. Pisisartut atuisullu piumasaat aallaavigalugit, nioqqutissat killissaminnik qaangiinnigitsut, qangamut sanilliullugu pisoqarujussuannortartunut aammalu sanaartortut atortussaatigut assartuinnerit naleqqussarneqartarput, ilaatigut selskabit iluminni aqqissortagaanni.

Tunu nioqqutissanik sanaartortullu atortussaannik pilersorneqarnera, sikuusarnera sikorsuaqartarneratalu ajornartorsiuteqartuarsimaneq assersuutissaqqippoq. Ukiumut marloriaannarluni pajunneqartarnerup nalaani sanaartortut atortussaminnik pilersorniarneqarnerat akisoqisumik pisarsimasoq anigorusullugu Atassummiit ilungersuutigisimavarput.

Nunap sanilitta Island-imiit umiarsuartigut akulikinnerusumik pilersorneqarsinnaanera akikinnerusumillu anguniarneqarnissaa. Tamanna Royal Arctic Line-miit allatut aaqqissuussisoqarnerata kingunerisaanik pitsanngoriartinneqarnikuuvoq. Illoqqortoormiulli Tasiilamut sanilliullugu sulii kiffartuussiniarneq ajornartorsiuteqaqaaq.

Sikuusariartorunnaanera pingaartumik kitaata avannaani malugusuutigaluarialugu, ukioq manna umiarsuartigut pilersuiniarneq qanoq ilungersuatitsinera takoqqiinnarparput aammalu qanorluunniit politikikkut aqutissiuussinerit pisariinnerusumillu siunertaqarnitsigut, pinngortitaq aqussinnaanngikkipput takoqqiinnaraarput.

Nunarsuup ilaani aningaasarsiorneq ajorseriaraangat uuliamillu pilersuineq killeqaleraluttuinnarfiani, corona massakkullu sorsuttoqarnerata kingunerisaanik sunut tamanut akit qaffariartarneri aningaasarsionittalu innarlerneqarujussuarternera tamatta arajutsisimassanngikkipput ilimagaara.

Taamatut oqaaseqarlunga aalajangiiffigisassatut siunnersuuteqartoq qujaffigeqqippara, pisariaqavissorpormi pitsaaqutit ajoqutinullu nalilersortuarnissaat naleqqussarfigiuarnissaalu. Taamaattumik sulii aappassaaneerneqartigani ataatsimiititaliamut susassaartumut ingerlaqqaarnissaat Atassummiit inassutigaarput.

Qujanaq.